



ГАЗЕТА 1931 ПО' АПРЕЛЬ ИРЫ' ЮКАД ВАТА ХАСАВАЮДИМДЕЙ ЯЛХАД НАДИБЕРҢА

СИ' ИВ ЯЛХАНА НОПОЙ' СЕРТАБИВА"

Мэбета вадава" ила' панан' етри' мэква"!

НЯРЪЯНА

НЭРМ



№ 2 (5276)
2026 по'
январь иры'
10 яля
СУББОТА

Российская Федерация Ямало-Ненецкий автономный округ



Сидяңг: Марина Яр' тадтавы

Харта харбёкоця

3

Ялян' ңадимамда ңатева"

Тюку илангана вадина" нива ёхова' е"эмня хуркари" мутра" мю' вади-паклембидо'. Тодо" тэнз" ненэця" я' ханярина вадито' пилибт" таниява' нямна няркна". Вадидо' «Яндекс.Переводчик» мю' пэръядо'. Ыокханда мюнда паклевэдо' юркад ңодь" ва"җа.

Нэрм' тер" ңобтики тарця серм' пяць. Нюртейнэ «цифровой платформа» хана сыя' хаби" вада ңадимась. Тёняңы Хаби", сыя' хаби" округхана сертадонзъ. Вадавнандо' лаханана ненэцяндэ' няхар" ёнар" пир". Толырто' нядана" ңока" нина", ңысма", якут", бурят" ңэя", пыдо' мал' мале тарцясавэй". Тадди-кахад маня" ненэй ненэцяңэ хабина" ня' ңани' тэри нива" мы". Нина" тотрев' варёва" мэць манзарава".

Ненэй вадахад луца' вадан', луца' вадахад ненэй вадан' тидхаленго пэйнаць. Тэри хэвняд маниеб", ёльце нензел" ңамгэраха. Тад пыва' сер' тоена: сисяда пэдаравна миндарахан ңэңгун, ңопой яхаданд нерня' неңхалаңганаарахан' нин ңэңгу". Вадамда саць сававна тенева-нари пирдаленгуда. Ыадьбята манзаям' сертабадаңэ ңацекы тохолам-бади, вадам' пэрти, юне тэвола-ни таслаць. Маня" газе-тахана манзаранаңэ неповна ңарка' няд"мава": ма"лавы падвэва" ңока, паднава' серм' пэрць торомбэва".

Мутра' мю' ненэй вадам' пак-

лева' е"эмня ңокханда няхар" юр" ёнар" пир" предложения пада тара. Таддикахад сямбирув-нананда мутра' ниб"нанда ңод" иңудос", ненэця' пирувна вадам' нида теневаңгу". Ыамгэхэв" ниня хамэдамбадида тарем' ңод" ңока" ңэңгу". Ялэхэ" мэтари вади тидхалембаңгу.

«Яндекс.Переводчик» ңюбе-тахана вадана" ңадимб", хусу-вэй ненэця' вадава" интернет' мутравна тохоламбаңгуда, ма-нэсартада. Харвабта ңысма, ңани я' тер ңэя, харта вадамда таминда ненэця' вадан' мэсь пиртада. Сямян я' сяр' ниня илена хибяри ңамгэ тэнз вадам' тохоламбаван' харва – тарцям' тохоламба пирта. Неноховавна ңэрм' тер" вадидо' лэтраңгу". Харе" вадидо' ялэхэ" мэта".

Вади лэтрамбада мутра сайт-хана ңа, яңга приложенияда тания.

Анна Яптик' падвы




НЕНЭЦЯ' ВАДА

ЯНДЕКС ПЕРЕВОДЧИК



Толангова
Вы' Нердена
Пяк Сёбар"
Няръяна Нэрм
Паны Ты пэрма
Вада Таңы
Тадэбя Ялэмдад
Нядэй
Савбага
Хаабр' Тасу' Тасу'
Савангеш
Тамбей
Неро", яв
Лаханакко



Сидяңг: Анна Яптик' тадтавы

Хабарта"

Ңыхы яхана ңэда хардаха"на мю-серта ненэця" тыдо' хабарталваха" танаба тамна тэтна".



2 стр. ңа

Мэбете"э Тэсида



Миндо' ниня ңам-гэхэрт' я"манархадэ' яңгу. Сяхаңгав' пывы серодо' техэ малхандэ' тэврамбидо'.

4 стр. ңа

Хэймай' пёдя"



«Хэймай' пёдя" – хэмхана мяналма шана'ку. Мякна мэ-на" ңашки" чупей" шана'коты". Недьня шичатуң няч' дидт ңамтнайхиң.

6 стр. ңа

Сидяң: Марина Яр’ тагтавы”



Хабарта”

Округханана” ханяңы яхана тамна тыдо’ хабарпидо’. Тикы манзаямдо’ лимбя’ иры’ пудана яляхана ёльцеванзъ тасламбидо’. Ыыхы яхана нэда хардахана”на мюсерта ненэця” тыдо’ хабарталвахана” танаба тамна тэтна”. Тарця юнм’ Тасу’ яв’ няд намдаваць.

Тазовской районхы Нэдя’ няңы ты пэртя” хабарталван’ нара’ хамеко пясетыд”. Џа-хакуд сянакова’ яляхана тасламбидо’, сян тым’ сыранда ха”ам”ммахад хадаванзъ тэвраңгу”. Нэрё’ ёльцяңгана та’ тэравы” тыто’ толыр” яңгаворңа”. Хабарталвахана манзарана Леонид Лапсуй вадида тарцяць:

– Ханяңэхэ”на ненэця” тэволана” тыдо’ тянёрка” нэсеты”. Сеней” таславы’ сер’ ни ереберцету”. Хусувэхэндо’ инзелева”, ненэциена” нядабасетына”.

Тюку по’ нюдя пэвдей иры’ няхар” юдимдей яляхана ха-

барта пэвыдаць. Нарка пэвдей иры’ пудана яля’ нэсонд’ тыдо’ тэвраңгудо’. Теда’ тэтнава’ паңохона мэ”. Тания’ манзараванзъ товы” варемдо’ мэ”ңа”. Џокханда юр” сидя ю” тонна нямзам’ нываванзъ тасламби”.

Ты пэртя” тыдо’ танаба тэврамбидо’. Евай’ салья’ вымна мюсерта Вячеслав Яндо тыда ханзер” танаба”мамда тарем’ вадэ”ңадась:

– Няхар” яля’ миңаваць. Сехэрэна” ямбадада юр” самляңг ю” нэдалава. Тюку по’ си”ив ю” тым’ таңга янамбовна танаба тэраваць. Нятенавахана” нямдотана” тына” матыбива”. Нани яляхана нямдодо’ ма”лахая мирдатына”.

Нэдя’ хой’ няна илени” ты” нямзи саву”ядо’. Хусувэй тым’ ты” лекар” няхакуд сававна манэ”саръядо’. Нэдя’ хардыхы ненэцяңга”на илена” сармик савумдамбада лекарадо’ Олег Няч тарця” вади хэтвысь:

– Яханана” тына” хэва” сава нэсеты”. Нямзидо’ халыси”,



хабто”. Тарця хабцяңга”на хаңгурти нояк хомбасетыва”. Хабартава’ нерня нули” сававна манэ”сарцетына”.

Тарем’ Тасу’ явхана тыдо’ хабарпидо’. Ненэця” тамна янамбовна мале сян яля’ харад’ няю’ тыдо’ танабаңгудо’.

Мэванда цока

Ямална” Законодательной Собрания’ нэвахана мэна ерв по’ ханзер” ваеравам’ вадэ”ңась. Едэй по’ това’ нерцю” юне тэволана ма”ламбись, лаханаконя”ңась. Нямэхэна едэйвана тэравы депутат” манзаям’, тад тованда похона пэрманда серодо’ хэтась.

Парламентхана мэвы” няби пеляраха несэймась. Сергей Ямкин’ вадавна тандая’ товы” депутат” манзаямдо’ тыхасовна тенева”ненэця”. Пыдо’ район”, марад” тиңгывна илена” ненэцие” серо тасламбавы”. «Едэй созыв’ тер” Россияна” нудандана’ няби округна” нэвахана мэна ервана” табеко нёда”. Цока” по’ ямбан’ минревы сехэрэхэдана” нива” ваераңгу”, сяхаңгав’ пывы минана” сер’ тамна’ тыха’ пэртава”. Нерцюй созыв’ ервы неда едэй товы нядабаңгу. Едэйвана манзаямдо’ тохоламбади нобтики табедамбаңгуна”», – Сергей Миронович тарем’ лаханась.

Манзара пэ”мадо’ саць хубта нибта нод” нэ”, пыдо’ яна” тер” илңгана тарана вато таславэдо’ мале сян. Округна” еси” пэнэсьм’ 2026-2028 по’ ёльцянд’ падвы”. Хусувэй илма” мэйрамбада серм’, проектм’ тикан’ мэвы”. Тамна нани’ нопойдо’ сяркам’ мирдапавам’ табламбава. Нямгэ” яляхана”на мирдапа вэва нэвамда таславы”. Сенз нэва’ е”эмня, хэбидя” яляхана”на тосакабтёда сер” нива нэдиберма’ е”эмня сертабидо’. Няхаромдэй ватодо’ ява” лэтрамбади” ня”марпада «социальной контракт»’ нямна нэ.

Ненадовна манзарабцом’ савумдамбаван’, цокамдамбаван’ сырңа”. Нарка маркад хэвняна нэда” ё” няю’ серодо’ тидхалы”. 2025 по’ нэрё’ няна районхат, нани” хардахат нэда” депутат” стажировка мэ”мыць. Илебей” ненэцие нани’ нидо’ юрыбю”, яля’ ня’ нэда проектадо’ минре нядабидо’. Илебей ненэцието’ парламент’ терад едэйвана тэраць. Пыдо’ 2030 по’ нэсонд’ ханзер” нярня’ мимамдо’ таслабто’ тараңгу. Тикыдо’ харе” и’ сер’ манзаравам’, манзаяхана вадёданвам’, илаңгана тарана няд”ми ня”марпавам’, ненэцие” нерня’ нэвам’ нядабабто’ серота”.

2026 похона саңондо’ ед’ ха”муванда” ти”: мяд’ тер, нэцекы, ява” лэтрамбади, нэрм’ тер нядабава; сензувна илева по’ ед’ нэдимдембуванда” сер”; тодо” тэнз” ненэцие” поё савумдамбава, мэйрамбава. Лимбя’ ирыхына нарка классахана”на мэна” е”эмня «Роль парламента в жизни общества» конкурсм’ пяңгу”. Нэцекы” видео тадтамбаңгу”, закон падыбади” манзаям’ няби ня”мавы ватодо’ ханзер” яна” тер” илам’ несэйдамбавам’, савумдамбавам’ вадета”.

Ява” лэтрамбадина” е”эмня

Тюку пова” «Год здоровья» нубе”ңа. Лимбя’ иры’ юкад вата сиднетимдей яляхана Новой Уренгойхад ненадо серм’ пявам’ намдаңгува”. Мэбета” пирдырти” мэлва’ мяд’ хэвхана ма”-лёда”.

Ямална” нэвахана мэна ервана” табековна мэ”манда похонана” ява” лэтрамбавына” е”эмня пирдырми цокамдаңгудо’. Тикы’ сер’ цока ненэця” пирдырмахана”на мэсь пиртадо’. Пыхыдадо’ вы-

сылпаңгу”. По’ ямбан’ хуркари” пирдырмахана”на нито’ поңгад нерня’ ха”амвэхэ” нудандо’ тернэ есям’ мипаңгу”.

Округханана” 254 пир” сайнормахана мэвы” ненэця” сёбар” илам’ нёда”. Цокханда е”эмняндо’ 2025 похона сиднет ю” пирдырмам’ сертавыць.

«Год здоровья»’ ед’ яна” тер” сенз нэва’, едэсаява’ е”эмня тамна хуркари” нэво сертабаңгу”. Тарем’ округна” тодо” хардахана”на едэй лекар” мядо’ сёбар” ненэцие” ед’ таславы” хардо нэмбаңгу”.

Харта харбёкоця

**Тандая' вадёдана' нацекы' поўгана нерня' нэдида', тохолко ва'лёйдо' тания'.
Ѓани' нидо' няндо' сыраць ғани' варемдо' мэцеты'. Тарця' няхато' енасеты'.**



сэдыба теневадм'. Ханяңэхэ'на не нацекэңэ хар'на' помнана' лаханакурцетыва'. Выңгана илена' нина' тензебтембасетыва'.

ХУРКАРИ' СЕРКАНА'НА ВА'ЛЭЙ НЭВЫ

– Тохолковани ямбан' ва'лэй нэвани е'эмня ненадумда'ми недовоцетыдм'. Хуркари' олимпиадаха'на мэсетыдм'. Ѓудани терад ня'амсетыдм'. Тарця' пирдырмаха'на нопойри предметм' нива' пэрцету'. Школьной Советхана тарасетыдм'. Ѓэрё'школана'президентад тэрабиць. Си'ми тэраванди' понд' падвыць. Тохолковахана вареми мэцетыдм'. Харвобтана' урокани': луца вада, математика, ненэцие' ил'. Тохолковани хавна тараванзэ ханцетыдм'. Мале сиднет по' танияна мэдм'. Хуркари' ненадо', хэбидя' яляха'на тарасетыва'. 2024 похона Москван' хан'наваць. Ѓарка маркана «Сокровища Севера» фестиваль нась. Тодо' яхат мядонда жокась. Сидна' няхаромдэйңэ тэраць. Тедахав' экзаменха' хамекудм'. Мале'мяхадани ханяна тохолковани нямна ими ядэрңа. Тедари' пунси.

Анфиса Ярой' манзаравам' ғани' теневада. Та' нёлёко нацекы тара тохолабавысь. Тикым' нули' тяхасовна ваде'надасть:

– Хардаханана' «Авангард» нубета мякана манзарадамзэ. Нацекыни' мун' мянкоця' нэсеты'. Хусувэй яля' ғамгэм пэрманда нэвами хамедёсеты. Падарт' падыбасетын. Си'ми тидхалембадини' танияць. Иры' ямбан'

пирдалевась. Пуна недбями ня'мавась. Тарця теневабцом' тохалавами ихиняни сава' то'олха. Вэба' иры' пудана сидя си'ив яляха'на Сочи март' хан'надамзэ. Яхадани нэдалёрта' танияць. Таддикахад тодо' хардахат товы' нацекы' ғани' жокаць. Хор' иры' нэсонд' танияна мэваць. Ехэрана ядембада ям' манэ'надамзэ.

Ненэсянда нод' хусувэй тохолавы теневабцуда сяхари' нянанда тараңгу'. Лаханако нями инда ядэробцо, сеянда ғамгэ' нямна няркнавам' тарем' хэтыдась:

– Хой' илми, вадами нули' харвобтав. Нянани ёльце сава. Теда' илебей' ненэця' жокаюм' пелядо' манзаядамдо' тохолаванзэ хан'на'. Ты пэртя' тянюмдана'. Ѓарка' ненэцяри' хаюрңа'. Ты' мякнани мэван' харвадм'. Едэй яңгамдана илаңгана нензел'мана илева' е'эмня тохолко ғани' тара.

Руфина Окоэтто' падвы

Нацекыдо' тид' табедамбидо'

Тохолкода' нацекы' ғарка няхатато' едэй' теневабцо хомбасеты'. Неноховавна сиддо' тохоламбадида' сава няд'маңэ школандо' музейм' мэцеты'. Танияна харто' яндо' невхы' иле'ми вадецеты'. Хуркари' ненадо' яляха'на ғани' нобт' ма'лорць ядандо' тарасеты.

Сёяха' нацекы' «Няръяна Нэрм» газетыхана' сава юнм' нэдабтаць. 2 «Б» класс' тер' Ямална' соя'ма' ялям' ядабтаванзэ школандо' музейн' ядэр'мы'. Сиддо' тохоламбадамдо' Япстик Надежда Нюбичивнам' няць Ямал' нямна ёльце жокавади намдавы'. Е'эмняндод' Тусида Меретя Григорьевна илека лахарём', сянакубц хамедавы.

Ѓобкана яна' лабакм', ненадумда'мамда,

етя таславы сёмда тензебтевы'. Окруғна' я' падаркана ғарка хардана', Ямална' еси, то, Пэ' хоё пюрмы'. Нэрм' няна илена' я' сармикэци, нув' сармикэци илесь ёто' сер' тярпавыдо'.

8 «в» классхана тохолкода' «День героев Отечества» яляхана сайнорта' ненэцие тензебтембавы'. Пыдо' ғани' музейханандо' ма'лэвыць. Ненадо яля' нямна помнандо' тасалкурмы'. Неноховавна теда' сайнормахана мэна' нисянадо' ивхалмы'. Ѓопой тохолко нядо' Александра Непомнящих СВО' няна яңгумы нисянда нямна лаханавы. Мэ'мы' вадита пуд мал' нопой иңут' ха'амвыд': «Нисянадо' сава серкана тара', ненэцие ғарка маяхад нэдаби'».

Галина Кинчина' падвы



Сидяңг: Меретя Тусида нэдабтавы

Мэбете"э Тэсида

Ямалхана хуркари" сё-барна" тая". Пыдо' нерняри" нэда" ненэця". Миндо' ниня нямгэхэрт' я" манархад' янгу. Сяхаңгав' пявы серодо' техэ малхандо' тэврамбидо'. Етри' варемдо' мэкая, ялэхэ" пыхыдадо' тохоламбидо'.

Нарка пэвдей иры' юкад вата няхаромдэй яля ненэся ненадо ялясь. Та' мальгана яна" тер' нямна сава юнм' намдаваць. «TYUMEN PRO MMA 3» нубета пирдырмахана Хальмер" Седе' тер Кирилл Тэсида мэсь. Тюмень' няна пирдырһась. Луца' вадавна хэта таяна «смешанные боевые единоборства»" һаць. Тарця һарка пирдырман' тэвормы ненэй ненэць' янгоравы. Нюртейнэ пыда пыхыдамда һадимде, нита сарпяд ера. Тедахав' ва"лэй сёбарна" һадиман' һули" маймбива", һармдыва".

Ханзер" пирдырмамда интернет' мутравна мание пир"һаваць. Турнирм' маниеванзь товы", сита нядабада", тенева" нида хэвхананда мэць. Тарота нядо' сюртё тодо" яхат талда вад' мюня мэна то"олхась. Вад' мюня таротаха' хавна сырта, тидхалеңгода, тасалкуртари мэсь. Тюку сёбар" сянакубц' тэнзхана ёльце халцукэй нэсь тара. Нэда, һудиди ненэця" мал' нядабидо'. Неновна ханзер" ладора таравам' хамэдамба серо"һа. Ниня серота" тыретава" һани' һока".

Тамна сасаркаванда е"эмня сырта" нита тёр" я"авлыць. Сиддо' намдвэдрев' Кирилл һоб" нись выдар", няданда торомбэрка пёда ня"мы нямда таминда тыре"һадась. Тюмень', Тюменской область' сёбар" Эльяр Гусейнов һодь" «мастер спорта» нювм' мэ"лувдавэй. Сидя мэва' һарка пирдырмахана ваць нерня' ха"мормы. Нобт' тебванди' мальгана, нюртей раундхана выңгана вадёвы хасавар нямда таси" мо"набтава, сохомдаңгова мутрахана пидевэда. Нябиюм' юрка я"мавы", пёдвамда нулта табедавэда.

Кирилл тюку ненадо пирдырманда нерня Ямална" ММА няби панкратион чемпионатха"на пыхыдамда сававна манэ"лабтадась. Округна" сяманхат мэбета һудаха"на пёдна. УрФО' няна һобтики медальм' ня"марпись.



Сидяңг: Кирилл Тэсида' тавы

Хонрамбавани мальгана харта нямнанда тарем' лаханась:

– Мань Нэдя' харад' няд һадм'. Сидя ю" сидя поми. Сибимдей класс' нэсонд' хой' нямна мюсерһадамзь. Тетимдей класс' нэсонд' Газ-Сале' няна нэда школахана тохолкудамзь. Таяна «вольной борьба»м' торомдадамзь, футболхана сянакудамзь. Пуна Нэдя' хардан' сидна" нэдараць, хасаваюдимдей класс' нэсонд' таяна тохолкудамзь. Школа' пуд манзара пэйваць. Армиян' си"ми ханаць. Армияхад то"мани пуд Хальмер" Седен' илелъяваць. Сёбар" ненэция нерня' пэрта центрхана манзаядми ходамзь. Тароць, пёда си"ми Максим Павлович Няч няби Сергей Вениаминович Яптунай тохоламбихи. Тарця серт' армия нерцю" лабцейваць. Няхар" по' ямбан' тикэми минрев. Тарана" теневабцони тамна һокамдам'. Таңар пирдырмам' ханзер" сертабавам', минревам' манэ"һадм'. Турнир нэва' нерцю" Новой Уренгой' няна, «Легион 89»хана ма"люрһаваць. Сомбовна тасалкуваць.

«Сармик»м' нубета сёбар" мякнандо' илебей" хасава" пыхыдадо' пёда, тароць то- холамби". Тохолкода" һацеки" һани' турһа". Сиддо' тидхамлембададо' Максим Павлович ма"нисяв:

– Навна Санкт-Петербург' няна тоходанба"ни тароцетыдм', сюрберцетыдм'. Пуна хар"н яхани тэв"махадани яни тер

тохоламба идеяваць. Харвана" етри' таяняць. Тарем' самляңг по' тяхана «Сармик» һадимась. Пэрта манзаями һади. Тидхалембада" сёбарни" пирдырмаха"на пыхыдадо' сававна манэ"лабтабто' – минми тид" һа, манзаями явнанда пэрһав.

Кирилл вадёданана" һацекехэ", тад сяхари' сёбар" мят' ядэрмандаха" тарця вади мэ"һась: – «Мэбе"ман' харвабат пэдаванд нэсонд' манзарасету"». Маня" һод' нянда мандава": «Етри' нерняри' мий", һобңгэв' варемд мэс", юнар ёльдпа һыхы я"мана ядэрһая".

Анна Яптик'
падвы

Нэर्म' тер" лаханако"

Ненэй ненэция" лаханако самлянзим-дей «Сказки Севера» нубета проект' тернэ хэвы". Тарем' серта"махад ханярина мэбата" һод", инда" харвабцовна лаханакодамда" намдаңгуда". Инзеле мэта мутрари тараңгу. «Яндекс Музыка», «ВКонтакте» аудиосервисхана хоңгуда".

Ненэй вадахад луца вадан' падвы" лаханако юнета Николай Дроздов' вадетыда.

«Нэर्म' няна хуркари" тодо" тэнз мэта" ненэция" иле". Пыдо' – сяманхат вырэй". Выңгана, тецьда яхана тыдо' лэтамба мюсерһа". Иландо' ямбан' ма"лавы" иңудота" вадидо' лаханакохо"нато, һацекехэ"то' мэ"эйдо'. Мань ихинани тарця серкана нядаңгурмами һули" саву"һав. Вадемыни" – я' сармик" нямна нэда" я' ва"ал". Тикым' һани' ненадумдавась. Мань илни ямбан' минревы манзаяханани я' сяр' нина илени" нямна лаханадамзь», – тарем' ненадо серкана таравамда вадэ"һась.

Тамна нядаңговы артист": Светлана Письмиченко, Михаил Черняк, Феликс Невелев. Инзелена ненэць' тэри пыдо' вабцридо' ни" намдаңгу". Ты" тоба" мун", мерця' выврё", хан' ханзад" ирна", вэн" һобеццо" һани' таянгу".

Теда' SKAZKISEVERA.RU сайтхана юкад вата самляңг тодо" тэнз" ненэция" лаханако хось пир"һава". Ханяңы" тамна һыхы" похо"на Нэर्म' терхат падвы" нэвы".

Едэй" манзаидо'

Ямална" нермбэртя һарка пэвдей иры' пудана яляхана марцьхыда няць едэй похона нэванда" серо тасламбавы". Нэर्म' яна" тер" илам' нерня' тидхалембада" мал' һобт' ма"лэвы". Тодо" серо ня"амбада" вадидо' мэ"мы". По' ямбан' серта таславы манзаидо' вадэ"мы".

Неноховавна едэй пом' Сензувна илева' поңэ мэ"мандаңэ" тензебтець. Нокханда 2026 по' ямбан' ненэция" мат' юркад вата яля' няю' нэда" серкана тараңгу". Поңганандо' ненадорка": тандая' мивы" лекар" мядо нэмбава", Россия' тиңгэвна нэванда" олимпиада", сёбар" пирдырма". Ямална" һудондана лимбя' иры' юкад вата сидндетимдей яля' Новый Уренгойхана, «Звёздный» нубета сёбар" мякана едэй по' нямна вадамда мэта.

Тамна һани янға лахарёнд' пеля СВО' няд товы" ненэция" нямна һась. Ханяңы" вырэй" яна" тер" мякнато' сёбар" пирдырмаха"на һобт' ма"люрһа". Тюку по' е"эмнянд' мале си"ив ю" пирдырмаңэвы. Нопойдо' округна" тиңгэвна минрена – Кубок защитников Отечества «Быть воином – жить вечно». 2026 похона нерня' ха"амвэхэто' һудито' тернэ есядамдо' мипаңгу". Дмитрий Артюхов' вадавна, е"эмнянд' сертабада" мероприятие тамна һокамдамба тара".

Россия' яна" нермбэртя мэ"мы" табeko һани' тасламбидонзь.

Галина Окоэтто' падвы"

ОБЪЯВЛЕНИЕ

СВОИХ НЕ БРОСАЕМ
ВСТУПАЙ В РЯДЫ РОССИЙСКОЙ АРМИИ

КОНТРАКТНАЯ СЛУЖБА
6 700 000 Р

ЕДИНОВРЕМЕННАЯ ВЫПЛАТА НА ЯМЛЕ
4 000 000 Р

ПОЛНАЯ ИНФОРМАЦИЯ ПО ТЕЛЕФОНУ
8(902)816-11-90
8(34922)3-98-08

МИНИСТЕРСТВО ОБОРОНЫ
РОССИЙСКОЙ ФЕДЕРАЦИИ

contract89.ru



Ямалхана
СВО' няна
сайнорта"
ненэция",
мято' тер"
е"эмня
һадимдевы"
няд"ма"

Невхы ненэця" лахарёхона я' мидкана тамна ненэй ненэцие" хавна я' тир' нимня мал тэңга ненэця" илевы". Теда' тасла тикаңэ харта тэри лаханако, я' ва"ал цэдакы, пунда теда-лахана яңгу нив". Тарем' цод" мал тэңга" таниявам' манэ"мы" я' мидкана цока цэсетавы". Тарць цавэ едтембавы" лахарёхона мал тэңга" пуйвэсото' няна цамгэхэрт сидо' яңговы. Не" цэсидо', хасава" цэсидо', пальтито' ха"молава' си" яңговы". Цадьбята тарць явна ядэрта", ненэцие" пяныдм' мэта мал тэңгаңэ нюмдебавыдо'. Сиддо' хомбавы" вадавна цорта цаврадо' тэри тинарпавыдо', нись таваба, сёнзито' мю' нивыдо' нихимбю". Цаврадо' тэри тинар-кая хаебавыдо'.

Пыдо' тарси" ненэй ненэця' пяныдм' мэ"мы". Сидя цэто' ниня ядэрмы", ханесятвы". Ла-ханабцодо', вадидо' цоб" тарем' ненэця' вадараха" цэвы".

Мал тэңга" таниявам' цоб" ёхо-вы ненэй не сэвхата манэ"мэда, сянхана тамна мякнандо' сеңтавы. Пыда нядандо' варета хунвы". Лахарёмда мал тэңга' нямна ненэцие" ха' син' серота сер' тэв-равэда. Таля' цаха" невхы ненэця" тикым' ибекая няхато', нюхуто' вадецетыдо'. Теда' мань царка ненэцяңгат намдвэми нянда" тэвраңгудм'.

...Цоб" не сельбя' няна поёр-



Сидяңг: Марина Ярой' тадтавы"

Мал тэңга

мы. Лакри' цули" синёңэ хэвы. Пыда сидя нямна сян сылабта, цамгэхэрт ям' тумда я"ма. Цамгэ' мянувна ныланаванзэ цоб" ян' цамды". Цамгэ' пират' сянхана хонаравы". Тад сидёванда мале синёда хэвы. Ехэрана ё" няю' тэв-вамда хамедада. Сэврида нюра-куц нерняри' яда. Неранда няна няхар" мядм' манэ"ца. Ихинянда мяк" тэвваханда цули" маймби. Нерняри' мица. Вары мят' тю. Пыда пелей' няю' мунзипой" цамды". Мяд' мюйм' ханзерпа

пя. Тарем' сырпата мякана сидя нес' ненэцяңг'. Ту' хэвхана цамдэ тодабцяңгана парадавы цамзи цорцаха". Помнанди' етри' пи-сянзэлаханакурцаха". Ёхобортане вадиди' савовна хамедэйда. Ненэй ненэця' вадавна лаханакурцаха". Пыхыдамда намдрамба янам-бовна ходолы". Савовна манэц' мяд' ерв ненэцяңг' паным' нихи' мэс", цайди' цархандо' торикокко таркана синды", тарсавэйха". Цопой сядоти' сабе тарто' яңгу, маниебцодо' яңгу, хаця пин-

кабтыхи". Мяд' ерв хасава лэнда цардан' тю"у' нулэй". Пя' мал-хана мят' тювы нен' цамзам' мица. Тад савовна ханзерманда: тикы цамгэ? Хасава пуй' вэта царханта мал, цамгэхэрт сидя яңгу, тынзида няхатато' та' минда пере". Хартида цули" сал-муй. Цамгэхэрт пуняңы хаврадо' ха"молава' сихартада яңгу.

(Пелямда цадиманда газетыхана толара")

Хэдо

(Нердена пеляда 1 номеркана ца)

Тарць вадита пуд хаңгурта сэвда талхая мунзяла"ма. Лакри' лахана ныхында яңгова' нид сята цани' вэнаба пята. Мякана тудо' пилипон' ту"ца. Вэсако хаңгуртам' хоба' мю' хурада, сея' няку' наволцада. Ненэцянда сядм' хоба' пелякохона синтада. Хубтахана вэсако хаңгуртам' пин' солада. Мята хэван' цолёкоця мядикочам' пал"ца, тикан' ненэцям' тюле-да. Тикы мяд' хэван' вэсако хибяхартм' ни цэдарамбю". Пыда мяканда тюванда нерня пыхыдамда етри' нибтебида. Яранзэ' икана сята, цудидида халтамби. Нябимдей яляхана хаңгуртадо' яңгума.

Вэсако хасава нюндя ня' сыра' ни' ха-ньюй ям' холкабтамба тодабцям' пятацаха". Тад тикахад ваңгм' сабкацаха". Вэсако харта тикан' хавы ненэцянда хоба' мю' хурая па-кледида. Тад тикахад я' цыл' такалцада. Нюхута хабця' нива палава' е"эмня, пыда цопойриңэ

манзая"цада. Тикамда сюрпа етри' тарем' нумд' хыномдорца:

– Манзаяван цота цод" мале илми мэс"-нисявав", цадьбяни хар"ни няби' ня' хэням' манзаяс нивав". Ет' мэ"мэда хабцянда няни нёямд пала". Нюкцини" тю"уй сыр-та сялил"ца. Тарця вэсако хабця' маня" нямнана" нёя ту". Пяныд' сер' маянд' ха"амвым' савовна я' цыл' цэдабтава".

Тикамда я' цыл' мэ"махадаанда хасава нюндя ня' тым' хадацаха". Тиканди' цэ-вэйтя' лым' таянда нинянда цамгэ' пирувна пере хальмеранди' ваңг' ни' хаеди'. Тад нерня' вэсако хабцям' мэта ненэц' тика-хана сюрва ненадо цэңгу нив".

Тад тикахад хальмеран' хаңор" юр' хы-дяком' хае, едкоцям' пире, пуда тудамад пята.

Нара' няна мюсе лакри' тикы сюрмэндо' цэсы' хэувна цадимя". Цыхы' яхад манэ"ядо'. Тарем' сырап" хававы мя" мале я' цыл' сояравыд". Минхандо' хэв-нямна сяркоцям' тания' моёкая хэлебтэйдо'.

Вэното' ха"ма" сянхана тэри юсида", ханодо', вандакудо' мале цахана тердо' тимы". Тар' пеля" хуна' тания' таняд пу"-лары".

Сяхари' тарем' хэдо' хабцяңгана хавы" хибяри" мяды" хэвнямна мюсярца". Тикаңэ хэбидя яңэ таславы. Сюрмдавэй тарем' яңгумы" ненэця" сидряңг", манзеты", та-лираңэ вымна ядэрца". Тикы ё" хэувна мюсяркарта ханац' вэва.

Месса вэсако цули" пон' иле-вы, нюдя цобтарем' секадёси" мюсермы". Вэсаком' цэванда нид сеня цавнанда хампюртам' пяныд' сер' сюрманда е"эмня тэри цамгэ савовна манэ"мэда цы" нидяв".

Хэдо' хабця', царка вэсако' вадавна, илам' тахарумбадаңэ ханяңэхэна цадиберта. Я' ниня тарси" цока хибяри" ядэрпата вэва. Я' сёнзяда табтомда, цока"я ненэцяңгат цэвада есьворта.

Ти, тикы невхы лахарё тэри тарем' цадимы ни ца", я' ва"алцэ тас-лавы.



Сидяңг: Марина Ярой' тадтавы"



Хэймай' пёдя''

«Хэймай' пёдя''» – хэмхана мяналма шана'ку. Мякна мэна' һашки'' чупей'' шана'коты''. Недья шичатуң няч' дилт һамтнайхиң.

Хувяне һамчутаһахаң, няч' хэм вешаха'' пон хынилтаһахаң. Кудюмч хэм'' недья ляпатаһа'', кудюм недья хаһумта һатамэһа – чики һашки катаданай. Нянта недья кудюм пишлай, һупчики катаданай. Кудюм ха'һу нэхэһа, кудюмт хэм ни' ляпатаһа – чикидюд нэхэдты. Тай'' ня нэхэдмы һашкэл һай һыди нямта каптаны. Чики нянта няһ һай хэймач' пёны. Таньше чупей'' шана'кота'' һашки'' хэмхана мяналты''. Кукинтун ха'һу нэхэһа, чики һашки нэхэдты.

Шана'ку «Хэймай' пёдя''» чикита хома, таньше мяналды һашкиуде нянта шат, хэмхи''

ненсама хынильш тохотаһа. Ха'һута нэхэһа, ватата минта нешаңэ вачутаны.



Татма: Андрей Пяк таттамы

Дяңклу''уди

Дяңклу''уди тады дилимай. Дёльше саха һэймай. Куки дёльшкана тальша вивһут няамһа: мыткуувдетай калитани'' мякат һамсуват. Дяңклу''удел майпёш дяхаң кысумна һануташ кады. Һануташ пях шапч, лапята- тондку. Талям дяхаң кысумна вентат шед лапяташ минья.

Малахана мяту'' маньһа, дёдилта нешади'' коһа. Һашкиуди'' дяңклуудим каптаһа'', няһта маһа'':

– Аңклайшов, аңклайшов, кадытат һамсудёв', кади катаһама'':

Дяңклууди малама:

– Һамы'' калёв', һамы'' калёв'?

Неша'' маһа'':

– Лаңкулка'', лаңкулка'':

Дяңклууди малама:

– Шой нюхов, шой нюхов, шой нюхов! Лым һамтам, лэн халкаптаньям!

Тайня һай дяңклу''удел дяхаң кысумна вентат шед лапяташ кады. Недья'куна малахана һыди калитана'' нешади'' мяту маньһа.

Һашкиуди'' дяңклу''уден маһа'':

– Аңклайшов, аңклайшов мячинсоды. Кадытат һамёудя'':

Дяңклууди һай малама:

– Һамы'' калёв', һамы'' калёв'?

Калитана'' маһа'':

– Детуку'', детуку''. Һыди кадыма дику.

Дяңклууди маньш вахалдыт:

– Шой нюхов, шой нюхов, шой нюхов!

Нит һамолт, нит һамолт, нит һамолт!

Чики дяхатата дяңклу''удел һай лапяхалды. Миндя. Недьяна һай мяту маньһа.

Һашкиуди'' дяңклу''уден маньш тальянладят'':

– Аңклайшов, аңклайшов шайнсоды, кадытат һамёудя'':

Дяңклууди һай малама:

– Һамы'' калёв', һамы'' калёв'?

Нашки'' няһта маһа'':

– Нику'', нику''. Һыди кадым нимьяш ката'':

Дяңклууди һай маньш канаһата:

– Шой нюхов, шой нюхов, шой нюхов! Лым һамтам, лым һамтам, лым һамтам!

Чикехет дяңклу''удел һай лапяхалды. Шапчай һану'кохонанта вентат шед минья. Һай һыди мяту маньһа. Неша'' дяңклу''удим мячиманта мэт мяктуң каптаһатуң.

– Аңклайшов, аңклайшов мячинсоды. Кадытат һамёудёв', кади катаһама'':

Дяңклууди тальянлай:

– Һамы'' калёв', һамы'' калёв'?

Калитана'' маһа'':

– Пыды'', пыды''. Һыди катамайма кадыма дику.

Дяңклууди һай маньш вахалдыт.

– Шой нюхов, шой нюхов, шой нюхов! Лым һамтам, лым һамтам, лым һамтам!

Тайня дяңклу''удел һай лапяхалды. Недьяна һука'' мяту маньһа. Ни'' детдяля'', калитун пилипи'', һашкиуди'' шана'ку''. Дяңклу''удим манёш һашкиуди'' дяхаң дет шулпьяш кады'':

– Аңклайшов, аңклайшов, кадытат һамсудёв', һука'' кади катаһама'':

Дяңклууди малама:

– Һамы'' калёв', һамы'' калёв'?

– Мытта'', мытта'':

Дяңклууди шоньшата хомяхама, майдыт: – Һашки'' недья мыттай мыткот һамдиташей!

Дяңклууди дяһ нядём лапьяһата. Тэтди пях шапч һанумта, тондку лапьямта дяһ моһа. Мяту дет шулпьяш элтамайтаһата. Мамадимта мэһа:

– Һашки'' недья мыттай мыткот һамклемэт һыдиш!

Дяңклууди нюньшимна мят вылкаһа. Неша'' мячинтамтуң ваав делт һамтаһатуң, һылта пях кычаң чел'' мытку'' мышчеһа''. Саха дяңклууди мыньчинта панмаң ченяһ мыттаһ мытку'' һамульдыта. Һамултаһанта пыхит һашки'' тальяндавон'':

– Аңклайшов, һанол ви'кня кады!

Дяңклуудел пин лахаптэй, һанунта дет шулвай. Таймана мыньчита панты, дяһна лэптһа. Шулпьяманта шед халдкочот тапхалды, дявстадым дяхат патдата пях муң ниһ мантэй. Мыньчита тыди һатады. Чикен вы'ылтайһа.

**Понантоң һалка неша'' манаһа'':
Кивы, саха һаймя вайма, саха нешиң
хоман ни' тэйван**



Татма: интернет һызың шелтамы

Хаби вэсако' нюдя ню

Лаханакоми хаби вэсако' нямна нэңгу. Хаби вэсако' няхар" хасава нюда. Нюдя нюда са"лако. Хаби вэсако' сыра', та' илебция"мана ханесеты. Ыамгэ' ёльцяңгана ханедада суса. Илебция" яңгу", ыамгэри ханеда ыани' яңгу. Хаби вэсако' тадхав' пэвсюмя' няна ыарка хасава нюхунда ма:

— Ебтов", ыамгэм' юдэсетынэй"?

— Яңгу, юдэркава юдэрцетым'.

— Мань юдэми тания. Сававна инзеледа". Мань юдэрпанани илебция" нэрм' няд тосеты", иба' няд тосеты". Мань ыани' малңэ хадабастын.

Няби яляхана ыарка хасава нюхунда ыани' ма:

— Ыарка хасава нюңэ", пыдар ыамгэм' юдэсетын'?

— Ов, мань ыани' тарем' юдэрцетым'. Илебция" нэрм' няд тосеты", иба' няд тосеты".

Вэсако ёнэй хасава нюхунда манма:

— Ыарей", пыдар ыамгэм' юдэсетынэй"?

— Ов, нисакэй", мань ыани' тарем' юдэрцетым'. Ыока илебция" нэрм' няд торхавы, иба' няд торхавы.

Тад вэсако нюдя нюхунда ма:

— Ыарей", са"лаков, пыдар ыамгэм' юдэсетынэй"?

— Юңгов, мань юдэрць ехэрады". Ыахат ыопой яхана нидам' ыамдэ". Ехэрав, юдэ ыамгэ' то"олха ыэбта?

Вэсако пухуцяханда ма:

— Пухуцёв, пыдар ыамгэм' юдэсетынэй"?

— Вэсаков, мань ыани' тарем' юдэрцетым'. Ыобтики пыдар юдэнд сер'.

Няхар" яля хэнякы. Няхар" яля' ямбан' хаби вэсако' юдэмда вадэцетыда. Няхар" яля' ямбан' сидя хасава нюмда, пухуцямда хонрамбида. Юдэду' ыопой' то"олсаңэ хан"яа".

Няхаромдэй яляхана пэвсюмя' няна ма:

— Ыарей", са"лако нюңэй", ыамгэм' юдэсетынэй"?

— Юңгов", мань нидм' юдэрцету". Мань ыопойри юдэми тания. Мань юдэрпанани сидя мюды' вадарцетым'. Няби мюд-ни ханта си" малңэ парисе ты", няби мюд-ни ханта си" малңэ падвы ты".

Хаби вэсако ненсюмя:

— Тахакав ханзер' ыа? Сидна" писядан? Манья" саванзер' юдэрцетыва", пыдар ыани' таниявна юдэрмэн.

Хаби вэсако' тад санэй" ыани', са"лако нюмда нэкал"яада. Няби нудамда маля, няби ыэмда маля, пин' мода.



Са"лакор хуня"е ханта? Не-бьеда ма:

— Вэсаков, нюкцямд ыамгэ тарси" маядар?

Ёнэй няда манма:

— Нисакэй", няби нудахавада мали, няби ыэкцяемда ыамгэ тарем' маляр?

Са"лакор тари ян' хая. Ыопой ыэнда ниня, ыопой нуданда ниня, тёрда, ярда тания миңава. Хуркан' миндыханда, нара' няңы нувода ыявыда, хаерта сякана ядемя. Сэвхабида сава ыэ" ним".



Падта"ма": Руфина Окотэгто' сертавы"

Сэвда сава", няби ыэда мальсей", няби нудада мальсей".

Ов, ыамгэ' ёльцяңгана неранда ня' сырңа. Неры няңы ыамгэ? Мья" нэрханю". Лабта яхана ыэда мя". Ихинянда ма:

— Тики мядикоцян' тэввы ыэб"нани сава ыэись.

Тики хасава ыацекы тарем' мят' тэвы". Нё' сивня нялода хая. Мято' пелейкутвы. Пелей' нямна хая. Тяханяна вэсакохо' пухуцяха' хуюмгарт сэвди' яңгу". Ыобкана ыамдыхи".

Сэвсяда вэсакоюм' мамононда:

— Пухуцёв, нёми' нэрхэй". Ненэць' то?



нанда яля едм' норма нэрхавы, пэвсюмя' няңы норма тэвы". Макода' сихид, тую"уд симзы' сер' еся иня' малхана ямб хыдя ха"мы". Ямб хыдя' мюня тандая' пиревы ыамза таниявы. Тики ямб хыдар вэсакохо' ыыл' ыамды", няхар" ыамза' ютер" таниявы.

Вэсако нудахана хоръяда, ма:

— Няхар" ыамза ютер" то. Маяндортаңэ, пыдар' еяр ыобтики ыэя. Та ыорбин.

Ыорңадо'. Ямб хыдядо' пырдари' хая. Няби яляхана

тики ямб хыдя ыани' ха"мы". Ыани' няхар" ыамза ютер". Тад ыорңадо', ямб хыдядо' тую"у' хая.

Вэсакохо' пухуцяха' иди' савумлаха'. Сэвсяда вэсако' манзеты:

— Пухуця, ыавнани сэвни таниява' мальңгана мань мивы-ми ханми мэп"нанд хасава сит хамзасетыню"?

Пухуця письңэ хаңада:

— Ха-ха-ха! Вэсако, ненэся тарцясь.

Тад пухуцяр ма:

— Вэсако, мань ыо" сэвтавани мальңгана мань сэдвэми панэми мэп"нанд, пивня ядэрмананд не сит хамзасетыню"?

— Ха-ха-ха! Пухуцёв, нена" си"ми хамзасетынаню".

Няхар" яля' тарем' мэнакы", хасава ыацекы пин' нялода ханцетакы. Ыамгэ ёльцяңгана пэвсюмя' няна вэсако' манма:

— Ебтов", нудахаюд хор-каюн"!

(Пелямда ыадиманда газетахана толара")

«Ненецкий фольклор»
толаңгобць' мюд ханавы.

Таймыр' тер, Яр
Василий Дмитриевич'
ваде"мы, няданда
К.И. Лабанаускас' падвы

— Калэй", нивню" мание". Ыамгэхэв тонакы.

Хасава ыацекы вахалй":

— Ирикэй", иленадй' ненэ-цяңгавадй' нэрхадй'. Мань ыэми мальсей", нудами мальсей", маяндортады".

— Ов, ебтов", маяндорта-кон ыэхэваб"нанд сэвкуд ни" тания"?

— Мань сэвхабини" тания".

— Няңэни хэван', синяңы хэван' — тикавна ту"! Си' няна иле"!

Хасава ыацекы си' ня' хая, вэсако' си' няңы хэван', ва"ав-комда тикана мэ.

Пэвсюмя' няңэңэ хая. Ыав-

Сидяңг: Марина Яр' тагавы"



Нули" ңарка манзая

Иландо' ямбан' ненэй' ненэця" хуркари' манзай пэрңа". Тарем' нерняку' нибто' ңа", хибяхартадо' тюку я' нина нись хаёд". Хусувэй ңамгэ" тарабцодо' таяя". Тюку вадава" вы' тер" нямна ханда, ненэйвана мел" не тензебтеңгува". Ханзер" ембдяродо' сэдыби", хамедамби", мал' вадець тара".

Нули" нюрте"э' ембдяр" ням-на вадам' мэтава, мел' не" ням-на паднаңгува". Тюку илаңгана пыдо' хуркари" сомбой" мальци, паны, пиби сэдыби". Сэдыякуцидо' паскойңа хан"ңа". Тарем' ниб"нандо' сэдора" мято' тер" ханьторта", серувандадо' яңгода. Мято' тер ембапа варемдо' мэ"ңа". Манзайдо' ёльце паской-вана сэдыбидо', сертавыдо' ңамгэхэртадо' ни манэцю", сэври" маябцо".

Тедэ' тасла нив тара": ханзер" хоба", пена" тарем' серуванда ңамгэриңэ хан"-ңа"? Сян по", иры" сертабидо'?

Мэта" паны", мальця", пива" нум' няд ни" мантыр". Хусувэй ңамгэ ңудахана сертабада. Ңатена, тенева тара, ңопой яляхана манзая тензебтембада ни ңа".



Ёльцямада тасламба серо"ңа, тикырихина ңоб' мальңгана ненэця' ни тыхынаңгу". Сэдоравыхана ңобтарем' тарця, тасламба ёльцьм' нёда тара.

Ңоб" мальңгана сэдъя ни ңадибер", ханяңэхэна наңэдя по хан"ңа. По' ямбан' янам-бокоцявна сэдуванда ңамгэри ңадиберңа. Мальцяхана, панэхэна мале сян хоба тара: пандад, яндад, мальця' сава ңэдакы". Хобари мась ңэсь ни


пэр". Пена", ной", ханяңэхэна лидяңгэця" – мал' тара". Нюртей ңахакуд тэраңгудо', мэядаңгудо', сямдраңгудо', пунахав сэдаңгудо'. Тикы' пуд ңани' якэн' ляңгабтаңгудо'. Хусувэй ңамгэ таминда пыя' ңыл' хамедёдаңэ ни ңадибер"! Тарем' таслахая, наңэдя пом' мадаңгу, ханяңэхэна тамна мале ңока ңэдакы. Нули" нюрте"э' тарана ембдяр' тарабцом' тасламба, ханяңы" манзая" пуняку' ха"морцеты". Неноховавна падтавы" пива", паны" ңока сохом' хан"ла". Ханяңэхэна сэр" панэн' харваб" сэр" хобар" ни ңадимд", нись таслахая сертаван' харвана ңамгэримда мел' не пуняку' мэңгуда. Сэдорана ңуданда нина ңарка манзаям' ня"амби, тикыта хавна мяд' «ембдяр» сэдыби.

Ненэй' ненэцяңэ, выңгана иленаңэ поңганана" сэдорана" не" нули" ңарка таром' ха"аврамби"! Пыдо' сидтипой" нерняңы ялява" яңгода. Тецьда нумгана тэри ңопой ян' ханимдава".

Татьяна Сэротэтто'
падвы

Хобцоко" <

Таслара", хурка
вада" сюры"?



РИ



"



"" АҢГА



ЕЙ=А



А



, Ы

Татьяна Сэротэтто'
сертавы"

Газета
«Няръяна Нгэрм»

Главный редактор
Яр Марина
Тэтакучевна

И. о. генерального директора
АНО «Ямал-Медиа»
Чигиринова Елена Константиновна

№ 2 Подписано в печать 26.12.2025 г.
Вышла в свет 10.01.2026 г.
По графику: 16.00, фактически: 16.00.

ПОДПИСНЫЕ ИНДЕКСЫ:
на год – ПА701,
на полугодие – ПР562.

Учредитель – департамент внутренней политики ЯНАО
(629008, ЯНАО, г. Салехард, пр-кт Молодёжи, д. 9, каб. 708).

Издатель – департамент внутренней политики ЯНАО (629008, ЯНАО,
г. Салехард, пр-кт Молодёжи, д. 9, каб. 708)

Газета зарегистрирована – Управлением Федеральной службы по надзору в сфере
связи, информационных технологий и массовых коммуникаций по Тюменской
области, ХМАО-Югре и ЯНАО от 19 апреля 2012 года.
Регистрационный ПИ № ТУ72 – 00559

Тираж 3600 экз.

Заказ № 6 тз (тираж 3600 экз.) отпечатан в АНО «Ямал-Медиа»
Юридический адрес: 629003, Ямало-Ненецкий автономный округ,
г. Салехард, мкр. Богдана Кнунынца, д. 1, каб. 106

Фактический адрес: 629007, Ямало-Ненецкий автономный округ,
г. Салехард, ул. Чубынина, 39А

Газета выходит по субботам.

Цена годовой подписки 166 руб. 84 коп.

В розницу не распространяется.

Адрес редакции: 629003, ЯНАО,
г. Салехард, мкр. Богдана Кнунынца,
д. 1, каб. 106
тел. +7 (349 22) 4-53-32

E-mail: nn@yamal-media.ru